

元社詩序

小瀛洲社會圖記余兄念之得於徐襄陽先生裔孫
承祖臨摹剞劂燁然流播人間而社集諸詩尙闕彙
纂因與幼卿錢子共肆編摩余大父西臯集聿先鉞
板徐東濱宦遊歸田二稿則余兄念之所鏤而東圩
翁季子懋穀公梓有錢臨江集錢公良詩選西村翁
孫梓有西村詩稿石林法嗣平野上人梓有石林外
集余復於劉揮使家塾索得海村春臺集抄本又於
文獻各集簡得豐厓翁數詩幼卿亦蒐獲西村勾溪



豐厓各逸詩惟古厓篇章頗難尋輯諸什既嘗余與
幼卿殫宵旦之力編次成帙廼命兒令聞遴工付梓
余惟鹽邑僻處東偏其於寓間渺然一黑子之著面
耳然大海之所蒸滙秦峯之所停毓秀攸晴嶠明壑
朝霞人文蔚興甲第雲起至於亭臺池沼亦復漸次
殷繁策杖攜尊不乏流憩乃 昭代三百年來獨十
老人以社集鳴甚且襄陽故園顏以瀛洲名目迄今
令人低徊遐想更考閱圖記中握手立談把卷評奕
畱連物 軼塵踪無金谷絲竹之娛而止有蘭亭

觴咏之樂 視人世所謂聲色富貴不啻如電光瞥
眼而祇以朴忠淡厚之致頤順生平舒卷隨時行藏
自得迨其發爲藻咏爛兮若雲漢麗空皎焉若日星
布曜故余嘗謂彭澤步兵皆千古大經濟人也彼惟
不屑滓溷遂爾寄傲松菊箕踞竹林顧其垂什遺文
無不回環習誦向往欲飛概可知矣茲十人者當清
寧無諱之時與道伸詘亦文亦武或升或潛摠有把
握於胸中故能仕譜鑄芬考槃播馥流飈逸響足爲
我東南輝映不朽爾若夫編纂之勤錢子幼卿誠不

媿東圩翁堂構而余忝爲西臯公後亦竊附一得之
愚云西臯翁孫鍾祖述君明父敘

小瀛洲社會圖記

嘉靖壬寅四月之望予舉社會於小瀛洲之時賞軒
維時靈雨初霽凱風自南闌藥翻紅林篁挺翠黃鸝
載鳴於淡樹紫燕偶語於重簷物情咸忻衣冠萃止
鐘鼓旣設獻酬廼行童子歌鹿鳴伐木之章繼之以
南山有臺之什四美具而二難并三壽朋而五福介
盟申可久事續香山邦人聚觀士類傾慕維我西村
清醇溫粹齒德俱尊東圩恭儉循良橋梓濟美豐厓
多聞直諒枳棘鸞棲南谿履道純誠薇垣鳳翥勾溪

清修固守吟步少陵古厓慷慨賦歸興伴陶令海村
敦詩說禮志樂林泉西臯邃學壯猷道存經濟石林
靜崇釋典雅有儒風予期志在齊賢躬躋寡過皆荷
朝家之作養樂王道之平康仕無愧于軒裳隱有光
於丘壑者也墨山陳子詢式瞻勝美爰付丹青冠服
差殊意態惟肖竚立相語者爲西村豐厓西臯聚首
閱卷者爲東圩南溪勾溪挾童過橋者爲海村欲行
且顧者爲古厓坐以待奕者爲石林及余也西村姓
朱氏名朴年七十八東圩姓錢氏名琦七十五豐厓

姓徐氏名泰七十四南溪姓吳氏名昂七十三勾溪
姓陳氏名鑑七十一古厓姓陳氏名瀛六十四海村
姓劉氏名銳六十二西臯姓鍾氏名梁五十九石林
姓陸氏名永瑛五十七南溪福建右方伯東圩臨江
守西臯南昌守豐厓光澤令古厓龍巖令海村海寧
衛帥西村勾溪俱隱君子石林天寧僧子豐厓弟年
同古厓亦忝襄陽守也正德辛未進士東濱歸叟徐
咸記

題小瀛洲社會圖詩

小瀛洲社會圖詩

觀小瀛洲社會圖題以長句

十洲之西武原之上中有五畝青林宮水周堂下流
繞城之中襄陽太守徐老東瀛翁開林結屋小與瀛
洲同相看卽有弱水隔咫尺遊遨每有飛仙通往當
嘉靖壬寅歲徐翁招要九老成社會墨山陳子善丹
青傳神肖貌人人意態咸如生靜聽衆口語言笑傲
疑有聲九賓一主人成十錢臨江與吳岳伯仙令龍
巖及光澤齒德朱陳二隱君好文更有劉將軍徐翁
臨枰與對奕石林敵手天寧釋或羣而竝立相徜徉

或聚而比肩窺卷表中有南昌使君西臯公威儀楚
楚軀幹偉且豐是爲我友念之之祖翁此圖成自東
濱之賢主題辭紀事文亦古子孫傳來七十春裔孫
承祖老乏似續人後來流傳恐失守擇人卻付念之
予謂得收藏有如鍾念之可保千秋萬歲存無疑但
令玉軸長在乾坤裏其於鍾氏猶徐氏念之聞之喜
欲狂入手合圖與記旋裝潢我來一叩離嗜館懸圖
對酒樂飲爵無笑嗟嗟香山洛社徒落文字間寫真
卻失諸老之面顏天策學士亦有瀛洲之圖續元非

隱逸者英輩若斯圖者諸勝都兼備念之念之肯令
視作尋嘗事萬曆癸丑清和月震維俞安期題

鍾念之社丈出其令祖西臯翁前輩手澤并繪
圖成軸者見示短歌奉贈念之敢曰先哲之懷
不勝高山之仰云爾

古道今人面相訪我思先民徒想像不知其祖視其
孫宗曾子姓一俯仰閱茲前輩邁典刑曾以詩豪恣
欣賞展卷三復神與依天開圖畫生光輝於時海上
爭頡頏遂教諸子凌空飛三三兩兩一洛社何數香

山艷少微親裁遺篆手腕間歲鞋錯落生珠璣繪圖
貌像儼相肖近濃遠淡非天機乃知自來朝事多翻
覆達人平等蕉與鹿名利場中豈我拘簡兮簡兮任
適軸撒手英雄一釣竿何必君王賜休沐於今子姓
紛如雲嶙峋玉立孫成族天道好還豈無意公自騎
鯨逍遙寧受龍象逼蹴公將以恒河沙界爲遽廬而
又奚睇乎塵寰之橫目君其詢諸三島十洲休問塞
翁禍福造物忌爾以昭宣足音寧返於空谷天公自
將長俾爾以戩穀吁嗟乎君仍受爾先公之弗祿何

論淹留與神速癸丑春仲廿有四日東海沈孝徵題
小瀛洲十老會圖題詞

襄陽太守初歸隱瀛洲寫築城西景勝日名園樂事
多選集同人開社飲中有鍾翁亦太守餘皆歸宦南
昌友朱陳布衣緇釋瑛況也工吟吾邑首合爲十人
稱十老鬚眉大約都雪皜耆英盛會須有傳酒罷裁
縑畫筆掃此圖云是墨山子位置似出襄陽指微烘
澹染寫真態古拙衣紋冠履偉文雅風流此一時承
平人物摠堪思更披記文認姓氏恨不觴咏親追隨
惜哉襄陽血胤絕零落圖歸誰氏篋追摹新本亾弓
存幸矣南昌有裔孫一百年來人事非徐園易主蹟
湮微會裏舊家知幾在爾鍾門第猶崔巍籛傳是物
皆非寶獨此羹墻見祖考神光滿襲加護持會參子
孫萬年保後學胡震亨題

跋

萬曆戊戌歲余小子保始得讀前記於海鹽文獻
志中展玩再三信是文中有畫不覺欣然神往歎
前輩風流之難乎繼也又十有五年而爲壬子徐

襄陽先生之孫承祖已當衛武誦抑之齡而有鄧伯道乏嗣之厄思茲圖與記之或失其傳沒此勝事念余祖西臯公並是瀛洲會上人而予性復恬曠好談訊先猷因授焉余於是合裝成軸掃室焚香而瞻拜之無何吾友沈永思觀察歸自天中俞羨長徵君來自白下讀記披圖咸有題咏誼甚盛余小子不敢祕茲圖記爲家珍過佚前光以虛諸君子之雅則又復且錄且繪梓而廣之嗟乎先生之爲圖記在嘉靖之壬寅而歿在丙寅嘗聞之故老云方壬子癸丑之際夷氛甚惡所在儲積懼害當事者議徙厥倉於城減之中而難其吉壤僉曰徐太守之南園便先生慨然曰獨樂何如與衆乎吾素笑文饒之愚安用戀此遂去若脫屣無難色迄今賴之則是當先生未捐賓客十有四載之前其瀛洲社會之場已非復先生有矣而先生與余祖西臯公暨諸先生遺像乃垂七十年餘而歸然獨存面目冠裳儼有生氣忽見不似畫而靜聽疑有聲文章畫圖兩相映發安在九原不可復作乎

然則先徐襄陽而亾者瀛洲社會之地後徐襄陽
而存者則瀛洲社會之記若圖也先生之所託以
不朽者固在此而不在彼也歟哉其後之有無又
何足淡論時萬曆癸丑歲夏五月之望鍾祖保謹
跋於離嗜館中

凡例四則

一先正社舉首重引年故詩次前後俱以歲表爲
準用志古人尙齒之義

一陳古厓年居海村上因篇章散軼徧蒐續鈇故
附綴卷末匪敢倒置鴈行西村勾溪豐厓三翁
亦尙多掛漏並須補遺以成宏覽

一茲集所載耑紀唱酬社咏間入覽遊感賦之作
以見先輩胷次俾倣觀摩

一集中字畫悉遵功令如由常檢照之類並改從

繇嘗簡炤式凜同文至於亥豕魯魚尤精較讐
差足備一邑文獻

小瀛洲十老社詩目錄

卷之一

五言古詩

卷之二

七言古詩

卷之三

五言律詩

卷之四

七言律詩

卷之五

五言絕句

卷之六

七言絕句

瀛洲社十老小傳

長樂郭
孫子也

東圩翁孫錢孺穀撰

懷室

朱西邨山人

朱西邨諱朴字元素貌臞脩挺音琅琅清出塵表隱居腴道絕嗜罕管性耽詩老而彌篤兼善繪事輿到輒作雲林小幅入仲珪米顛之室吳門文徵仲關西孫太初咸相唱酬一時里中高賢如公良德翼彥材子正輩並把臂結泉石盟選辰鬪題殆無虛日每至酣暢則弄笛月下作叫霜裂石聲不問而知為諸詩

人出游也。公既名高風雅而韻宇夷粹。雖樵爨牧豎並嘖嘖。西邨翁爲有道君子。中丞直指行部平原。干旄錯於巷左。公布衣芒屨。揮麈雄談無不動色。傾倒郡守徐公白。泉邑令李公奉魯相繼。教爲飲賓。公謝不赴。時論趨之。給諫許雲村將葬父。擬得名輩題主。從旁者舉當時尊顯爲問。許曰。眼前纓組不乏。顧年高有德。終讓西邨老布衣。卽踵門詣請。其爲間黨嚮慕若此。公年八十有六。所著詩孤清警拔。篇什甚繁。燬於兵。公孫綵哀其舊稿。付梓。曰朱西邨詩集。

錢東畬郡守

錢東畬諱琦。字公良。幼峻整。目無忤視。以古忠節自期。讀書淨業山房。一榻十年。衣不解帶。燈帷如墨。聞祝虛齋先生講學海昌。偕南溪吳公負笈受學。旣授外舍。淫者犇焉。公弗納。虛齋廉知之。卽日遷內舍。命其子繼臯北面執弟子禮。學逾淹茂。弘治辛酉登鄉薦。正德戊辰成進士。授時貽令邑。故無城。值流寇齊劉輩竊發。執郡守劉祥。勒船渡淮。民情洶洶。公上守。准議於當事。躬擐甲冑。誓死防禦。更曉諭百姓。激以

大義咸踊躍受令賊知有備不敢犯卒保長淮歷遷
刑禮二曹 武廟南巡公偕同官周任抗疏力諫不
報擢臨江守屬邑新淦地廣民悍夙稱難治公請析
建峽江縣復 上疏以所釐引稅爲城郭學較坊保
諸費寬其租十年民不勞而工集至今郡邑並祠名
宦嘉靖乙酉分試棘闈進賢江治吉水羅洪先秦和
郭應奎皆出公門政譽日起因強項不善貴人調黜
之思南拂衣告老築小樓數椽顏曰東白坐臥其間
日吟咏自樂與西邨輩十老人結耆英社祓俗離塵
穆然蕭遠居恒仿家禮祀先置義田贍族遵藍田鄉
約訓閭里爲德不勸宗黨賴焉林下二十餘年壽八
十有六崇祀鄉賢所著有臨江集公良詩選雩史測
語行於世王弇州先生嘗言習公詩若文者見以爲
才士及誦南曹疏者見以爲直臣及臨江盱眙政者
見以爲循吏及與稱鄉後進者見以爲善人君子蓋
公實錄云公六子夢太學芹永州守壹儀部郎葵齋
上舍齋後贈長寧令藜於潛學博詩文各自有集文
采淵源世世勿替

後學鍾祖述填諱

徐豐厓令君

徐豐厓諱泰字子元性愷直簡率善記誦一日不怠
年十二從仲父晟學詩有奇句名噪菘林弘治甲子
鄉薦再試不第授桐城學博作悲世賦以自廣旋改
蓬州學正上瞿唐沂巫峽縱觀嘉陵山水領其奇險
交益進遷光澤令潔己字民撤去一切文網慈祥樂
易政多惠聲顧不計折腰上官拂衣歎曰余非角抽
毫今髮且種種不能自致清祕揮金匱石室之藏迺
日事手板逢迎千載而上將無爲彭澤所唾遂解綬
歸宦橐蕭然衡門環堵不以介意讀書吟咏高蹈海
隅雖歊暑凝寒未嘗釋卷里居四十餘年如一日也
公文整而聳力洗餽飭嘗爲邑侯夏公浚脩縣志簡
核典則與康德涵武功志爭衡競爽云所著有玉池
稿玉池談屑春秋鄙見皇明風雅詩談女學諸書

吳南溪方伯

吳南溪諱昂字德翼六歲喪父端穎不凡從祝虛齋
顧雲谷兩先生游博綜經史及宋四子書嘆曰學莫
先於主敬顏其室曰敬齋弘治甲子舉於鄉明年成

進士授宣城令廉介自持教民耕織陳請豁免官莊
老稅百姓戴之旋以繁調新建會寧庶人橫索租民
不堪命匿丁家山以拒庶人宣言民反宜速兵公弗
爲動卽入山諭民民立散歲大飢官無儲粟公晝抽
補法賑沽萬人戊辰華林盜起公日夜籌兵餉竟以
勞故胥左目寇平歷遷兵刑二曹己卯僉憲雲南明
年乞休養母尋起備兵福寧獄有坐妻殺夫者公疑
而默禱夢小兒據人腹寤曰必杜福子廉縛其人一
訊而服閩稱神明古林曠盜煽聚公率兵捕渠魁周
馬良解散其黨癸未復乞休養母乙酉母歿喪葬如
禮戊子服闋家拜山東憲副守徐州江淮飢建議請
賑飢而不害遷福建叅政閩人聞公復來額手稱慶
壬寅侯官囚逸戕藩臬相戒毋犯吳公明年晉右方
伯又明年夏雷震麗譙公曰閩災也罪在旬宜卽日
具奏自免疏三上始允致政公攜圖書數卷歸南溪
故居坐臥萬卷樓中冥心搜覽尤好周禮叅訂諸說
附以己意凡四易稿而書成家居苳鞮竹杖混跡畊
漁善氣蒸人驕風丕變然遇鄉曲大利病公必抗言

丙申海塘圯民廬漂溺公上疏乞專 勅京朝官監
築 天子可其奏 特命水利僉憲黃公光昇經理
番鋪塘成屹然已亥邑大飢癸卯甲辰琿飢公緘救
荒議於當事力請獲賑一方賴焉壽八十有 所著
有南溪集藏家塾鄭端簡公云明有兩方伯天台陳
公華亭夏公皆人傑也公學問淳固如天台見幾明
哲如華亭而安貞履順斂華就實尤不可及今子孫
猶居故第門戶未墜

陳勾谿山人

陳勾谿諱鑑字用明幼任俠善騎射擊劍蹴踘從游
閒者交長迺折節讀書閉戶下帷學爲詩歌人罕見
其面詩成出之無不人人膾炙與朱元素齊名所居
勾谿介處山海鯨波浴日蜃閣刺空峭壁崇岡層複
峽帶公徜徉其際凡秦峯用里澗淑鷹巢草木龍蔥
泉石幽勝之處杖履必到到輒苦吟隱窟僧寮淋漓
卷軸尤喜以詩學迪後進漢魏而下中晚而上咸體
分條析婉約示人故人亦樂宗之一時瀛洲諸君子
推爲社中祭酒公詩鮮芳幽蒨劇啄性靈絕無浮音

滯響聲價特高所著有勾谿集散軼未梓公第上舍
金仕博野令並有詩名

徐東濱郡守

徐東濱諱咸字子正豐厓同母弟雅度高襟駿材電
發以尙書領正德丁卯鄉薦辛未登第初守沔陽沔
地多黍鮮穀公教民引渠灌泉仿吳中播種法世享
其利居三載入覲屬吏借餽費名厚貨幣以進公
謝弗納廉譽益彰秩滿陟兵曹武廟南巡公每事
備豫大司馬喬公白巖深器之歎曰能助余者徐君

也擢守襄陽值妖民惑衆禍且叵測計磔其渠魁脇
從勿問餘黨悉解散去公爲政不事皦察苛細務持
大體人樂其寬廖太史鳴吾作楚紀列公於登積傳
童太史內方以餘姚孫衍華亭張弘與公後先同官
同爲三高云會中嫉者上計免歸杜門著書不問生
產嘗祿之羨悉畀仲兄節奉怡二親又爲築室以居
及兄衰老迎養於家事之如父里中稱孝友者必以
徐公爲式晚歲築園城闔曰餘春每遇良辰邀伯兄
豐厓泉邑中耆碩飲酒賦詩名小瀛洲社風流文雅

爲一時之盛人以白香山司馬君實故事地之嘉靖
壬子島夷入寇所在焚儲當事議徙邑倉於城中而
難吉壤僉曰徐太守南園便公慨然曰吾素笑文饒
之愚安用戀此卽捐地建廩迄今利賴壽八十有八
所著有國朝名臣言行錄澤山野錄四朝聞見錄
西園雜記鹽邑文獻志東濱三稿子清孺孫承祖咸
克家承祖乏嗣血胤中絕遺刻星散其悲伯道之無
後焉西臯翁孫鍾祖保梓公東濱三稿行於世

劉海村將軍

劉海村諱銳字蓄之狀貌豐偉慷慨自負補邑諸生
屢試不第以世胄襲海寧衛指揮使蒞事嚴毅人莫
敢犯值歲飢抗論請賑又大疫捐俸市藥全療多人
公雖係出勲閥而學問淹洽故膽智雄偉遇事每裕
擔當大志弗售慨焉耽隱抽簪適軸寓意詩篇與瀛
洲社諸老賡和唱酬卓然自振於儔伍矣公嘗有家
奴名木者善射應弦命中一日水鶴集于資聖寺鳴
吻木弋之貫其左翮鶴帶箭而翔盤旋良久竟集公
庭中如泣訴者公曰嘻必木也命拔其矢縱之不能

飛隨令木飼養旬日鶴創愈向公鳴舞翔翔而去咸謂公盛德所感公壽八十有 所著春臺集行世子姓蟬聯並擅風雅玄孫揮使堯年以詩鳴於里中

鍾西臯郡守

鍾西臯諱梁字彥材稟性端介不縈利祿正德庚午以毛詩領鄉薦甲戌登第爲刑曹郎疏諫 武宗南巡杖 闕下 世廟嗣統錄其忠加俸一級日精門災 勅慮囚江南免死者一百三十五人有僞以同籍東投賄者立發而按治之侍御陳公察薦知濟南府時萊蕪寇攻陷城邑公僇力條畫兵事多斬獲功上賜白金文綺旋以母老乞養歸都御史潘公珍

薦起補南昌守宸濠亂後權力撓法公一切裁正更定湖地賦役豪右斂跡無何丁母艱卽疏請致仕築室郊西與林居諸賢及布衣衲子結文酒社號西臯老人又四十餘年歿壽八十有二臨終自爲墓誌比于傳休奕柱牧之人欽其達焉邑志稱公進則摠忠砥職退則潔已範俗爲方洲張黃門後一人嘗自叙貧不屈身仕不易節隱不干譽老不妄求可爲實錄

鄭端簡公亦言國家有若人不應使老丘園咏宋人
得志須爲天下雨放懷聊占雒陽春句深嘆其不可
及云所著有西臯集有世公四子韶公安學博夏貴
溪丞嘗捐粟賑施有四體詩刻護諸生句貢士授秩
提舉子姓蟬聯名譽不絕

石林上人

石林法諱永瑛本名家子薙髮永祚寺沉默早慧內
外諸書多所研悟國初楚石琦大師以名德開山
嘗召至金陵較譯梵筴賜紫衣著語錄列於藏

典成弘德靖間有秋江師文湛雪江師明秀相繼嗣
響海上衲子以詩名者惟永祚爲冠上人系雪江派
澄懷物外意致閒遠瓶鉢所資嚼然無繫顏其室曰
炤心兀坐耽枯若罔所識及質疑送難響荅泉涌了
無滯義禪習之暇或抱杖林臯境與神會輒下筆成
句嘗曰詩理性情已矣使鉤深徼僻以示工如吾性
何故其詩不尙彫飾寓雋永於渾璞不能喻諸人而
人亦莫之測也董兩湖先生嘗謂上人詩宗靈一皎
然笑而不荅一時縉紳名流咸把臂入社等諸支遠

云島夷內犯上人避寇間開示寂旅舍盛年諸作軼
於兵燹法孫戒襄檢其遺稿僅存十之一二梓曰石
林外集戒襄號平野有詩集行世天啓間喬納智權
諱法正亦工詩克嗣禪藻梵臘不永識者悼之所著
杏園集存笥

陳古厓令君

陳古厓諱瀛字幼好博綜高自期許中年不第
旋入成均所交皆天下知名士復困棘闈乃慨然歎
曰方今世界清夷不資格限豪杰吾縱未能從三寸


管博蕊榜花令頰首而就一官寧出俗吏下分毫靡
表見乎遂謁選人授宛平主簿堅清惠敏賢聲噪於
圻內遷龍岩令愷悌樂易閩人懷之比謝政歸日與
間黨名流觴咏自適所最善徐公東濱相對卽痛飲
傾倒拈題賦詩自玄髮至白首歡如也晚從西村東
畚諸翁結小瀛洲社於東濱園選辰命篇靡問風雨
如是者十餘載以壽終所著失於島寇兵燹多散軼
云



Large, stylized watermark characters, possibly 'EAST ASIAN LIBRARY' or similar, overlaid on the right page.







蘇州上人圖四

蘇州上人圖四





嘉靖壬寅前五月望日

墨山陳詢寫

萬曆癸丑六月朔日

古吳申於燕臨

順治己丑菊月朔日

金陵周龍甫寫

小瀛洲十老社詩卷一

東圩翁孫錢孺穀


西臯翁孫鍾祖述

輯曾孫

錢千秋

鍾令聞

較



五言古詩

朱朴

巳亥九日登高社集

百年過七十去多來日少行樂須及時歲月秋已秒
 今辰重陽節木落霜雨曉風流石林師肅客入林宵
 木鉢崇嘉蔬銅瓶貯清醪捫蘿躡重岩采菊披叢篠

履歷嶮巖盡暢然凌物表長歌應林谷遠縱極茫渺
仰面青天低俛首滄溟小太息寰宇內蠅螿何擾擾
日暮下山去西麓集歸鳥興劇有餘懽殘尊月中了

西湖

西湖天下奇妖豔殊可愛分明越溪女點染亾吳態
水花洗紅腴山髻峨翠黛波搖素練褰堤繞青蘿帶
丹青圖不成歌咏終莫逮相逢但無語含笑如有待
昔人去已矣今人復誰再勝賞君莫從黃金滿車載

苦哉行

年荒莫蠲糧蠲糧民益荒歲歉莫賑濟賑濟民益傷
虛名及小戶米入官家倉僅爲公門需那得充飢腸
苦哉復苦哉霖雨天降殃但聞流水聲不見白日光
菜甲短棲畝麥苗已萎黃濕薪及爛槎其價十倍強
二月春已半桃李無豔陽出門泥淖淡况復多虎狼
苦哉難重陳泪下霑衣裳

錢琦

鋤竹

此日此君醉手自鋤青玉我欲扶清風泠泠滿嶰谷

疏泉雲根下腰鎌刈菘菜日晏主人歸牀頭酒初熟
煙雨樓

危構入煙雨勢絕雲濤踴下臨若無地憑軒覺神悚
千家置欲浮孤帆遠猶動去鳥竟天沒落日驚波涌
聊此一振衣翛然失憂寵媿無仲宣賦借作茲樓重

登太白樓

高樓薄青冥勢可捫星斗中有謫仙人風儀長不朽
當年同賀監共醉任城酒一朝騎鯨去狂名落宇宙
明月炤洗水想像重回首

結客少年場

翩翩少年子意氣何縱橫寶刀耀霜雪白馬燦珠璣
春風吹楊柳道上聞新鶯招邀五陵俠賓從相與征
鬪雞東郊陌挾彈長安城薄暮入青樓胡姬笑相迎
手脫腰下玦酒換雙銀餅綠雲未敢度半醉猶鳴箏
殺人代報仇激烈爲不平白日都市間司隸那敢櫻
男兒貴狗義七尺本自輕願縛呼韓邪不受封侯榮

荒歲歌

人皆苦荒歲嘗聞此語我生七十年始以此身處

去年憂秋旱火龍齧麻黍極野無青草大地成赤土
糠粃斗貫錢米價不勝數四望無生煙董根那堪煮
守法寧救死閭閻忽嘯聚嗟哉竊祿人晏晏不知思
予抱嫠婦憂中宵泪如縷何以慰黔黎巖廊問霖雨

徐秦

剛風蕩浮翳

剛風蕩浮翳華月當瑤空珠露浥芳桂天香滿簾櫳
離離徑草內唧唧悲寒蛩悵然默坐久墻影轉梧桐

吳昂

歎老

行年逾六十老至不知老讀書頗識理卽事亦有道
春來花柳妍秋盡木葉槁悠悠物外身撫景幾長好

宿歸宗巖

截臬歸宗巖天設奇觀石無事便成遊不妨長作客
後倚峭屏蒼前臨遠溪碧曾梯九折攀寧讓梅仙宅

陳鑑

感興四首

唐虞治天下用德服九州世遠變澆漓殺戮爲我猷

利火自日熾名水自日流賢達棄不錄臧獲封公侯
俛首嘸千古白日下滄洲

其二

天地生萬物水火不誇功以色不以德人婢充後宮
梁木老空山奇花凋綺櫳如何萬乘尊莫致商巖翁

其三

幽泉過野石衆舄鳴佳音節物暮春及好風上靈襟
蘭芷有清馥託根荆棘淡此意竟何適感激來哀吟

其四

食力卧郊藪自信與世殊不爲利祿趨所幸完髮膚
草衣伍麋鹿安用金紫紆至樂尋醉鄉任呼爲酒徒
長揖謝富貴泥蛙遂踈迂

己亥九日社集五畝山登高

清霜被原野鴻雁南飛翔獲竟風日晴茲辰屆重陽
老禪具良書先日羅酒漿登高城西林讌飲山之堂
采采菊正花雍雍集冠裳幽期夙所契佳賞時相當
題糕畱藻翰整帽佩萸囊幸際之全盛偕樂身康強
短髮聊一花淺量仍數觴清歡惜日暮野坐隨風涼

浮生百年內百度亦有嘗
春潮大於屋春雨復如注
行人面無色只尺不可渡
畱君且莫行繫舟河下樹
昨日許豆人已被風水誤
薄酒不成禮殷勤在情素
明朝野水平送君東歸去

風雨

夢鶴齋

晨鐘破清睡月吐高林輝
棲鴉時一鳴白露搖空扉
孤枕寂無擾竹栢光燠微
平生百事拙得與塵俗違
兩耳點蒼塗不聞何是非
野心役泉石久住長忘歸
山風南窻來松涼上秋衣
花明池色淨悠然發天機
雙鳧有真意相傍不驚飛

徐咸

石林社飲分勉字

沉沉山桂堂寂寂晝簾捲
積雨暗空林几席上蒼蘚
山僧蔬筍徒治具一何腆
坐我蒼筍前雨興復不淺
再歌考槃篇世累伊爾遣
所貴敦友情不在樂沉湎
懿哉選佛場吾儕固其選
白日迫西山貞素願相勉

夜坐

涼颼落長松。明月出東嶺。空山夜無人。玄鶴不聞警。
嗟我有所思。所思隔高迥。呼童將素琴。欲鼓羅袂冷。
歎息復歎息。疇能駐清景。

自奕

孤航晝無聊。張局獨爲奕。戰守互主持。一手當兩敵。
手本無二用。用之各有適。方其勝不忻。敗亦無愠色。
旣免爭道譁。何慮旁觀識。大笑對尊酒。客愁悵然懌。
井南社飲得影字

時維沍寒候。風日不作冷。江梅泄春香。鳴禽戀餘景。
時物適我懷。忘卻酒力猛。逍遙步郊西。如在柴桑境。
颼風吹人衣。素髮颯垂領。浩歌入城闔。海鶴振孤影。
戲咏小東山後園隙地壘數石爲遊憩之所

纍纍小東山。蒼翠環吾亭。中峯怪而秀。矯若游龍形。
綿川聳天柱。鬱鬱干青冥。左股截靈壁。扣之磬音清。
石倚小空同。低雲洞中行。伏虎猶猛忤。神女何娉婷。
仰被嘉樹陰。俯挹幽花馨。山不在高大。有仙山則名。
詎意小軒前。有此晚對屏。日夕恣遊眺。聊以適吾情。

河源復古卷爲錢東圩題
黃河自西來百折經龍門東馳忽泛濫異流競奔渾
一朝循故道真源復崑崙吾邑錢大夫系出唐何蕃
傳世逮高祖徙戍羅施屯生兒未彌月棄之若雞豚
所賴錢氏翁育此一脈存來來三四世多子更多孫
大夫位通顯曾玄賁蘭蓀興言及厥祖黯然幾銷魂
幸有上世冢纍纍甘泉村思欲溯舊譜重感錢翁恩
作卷聊見志庸以示後昆旣斷緒斯續河源迺云云
孝哉重本念豈但薄俗惇嗣茲千百祀尚知敬所尊

劉銳

和答西臯

玄髮入松蘿已絕雲霄想花朝列罇疊月晶開簾幌
欹枕北窻眠涼風時薦爽經年寡送迎苔痕日滋長
疏泉鳴谷琴呼鶴陪藜杖每懷石戶農舟車時獨往
不爲利祿拘去就甚通儻回首謝朝簪煙霞有心賞

豐厓社飲

薰風滌煩襟庭柯交夏綠社翁有心賞邀我虎溪屋
松籟答琴響茶杯散碁局豈無燕趙姬歌舞揚新曲

長會有真樂非若縱耳目舉觴互酬會白晝繼以燭
客醉復欲歸舟車隘川陸願言結長好好相期有醇朴

雨中獨酌

玄雲壓重城四簷如決潦怒風吼萬竅振木若摧槁
一夜聲不止沒我庭前草垣墻盡隳頽敝廬亦難保
冥寂海上翁柴門閉昏曉念彼同心人相思路綿邈
把卷集百憂對酒迅如掃沉酣發浩歌請君聽我道
鵬鷖自逍遙夷跖任惡好巧拙豈殊途彭殤無永夭
歌罷復命觴睥睨天地小去矣濯長纓投竿伴魚鳥

鍾梁

石林社飲分得半字

梅雨送新波青蒲拂谿岸薰風入釣絲高汎薄雲漢
遠公辦社錢囊橐費其半七賢衝泥來文字相娛玩
滿傾碧玉醪飽餐白雪粲雨餘松檜涼庭前下雙鸛

述志四首

予少遭不造孑然無錐土服食每艱辛趨向惡卑俯
就姻於外氏蕭蕭一羈婁雖乏師友資自歷燈窓苦
蘭生叢草中幸不同朽腐叨承廩餼榮自茲有門戶

其二

微名廁鄉書繼辱春官選
小心恒乾乾不敢肆暴殄
居官祿入微僅足以自遣
家務苦經營子姓藉資膳
門無絲竹聲敦朴戒沉湎
匪以矯外觀惟冀罪戾鮮

其三

仕籍幸不削謝病棲林泉
所恨學術淺念念希高賢
締交皆布衣相與樂餘年
雞黍聊宴集談笑春風邊
一言涉華要自覺汗滿肩
鄙性乃如此進止無縈牽

其四

及老戒在得古訓良有以
一或有侈心終爲道所鄙
浮世漸澆薄聲勢日相倚
負重義則微貨全名必毀
八十享嘗珍茲福莫輕擬
昔賢何如人衡門甘飲水
九日可久會分得一字

九日天宇清楓林動秋瑟
石師結芳社侵曉掃禪室
茶鐺沸寒泉果榼薦霜橘
自謙蔬水貧情致簡而實
坐客得九人西村行第一
稜稜骨相堅畫品合詩律
東畬偕南谿霄漢舊儔匹
豐濱伯仲間文采兩超逸
野翁排塵務谿叟蓄詩帙
劉侯與賤子疎坦亦真率

雅興薄青雲雄談低白日杜陵屢悲秋世難恐相失
吾儕遯丘園暮齡摠康吉藐彼王侯尊奚慕神仙術
好樂貴無荒君子慎所恤平田禾黍稀野雀自啾唧

南谿吳翁

懿哉南谿翁抗志風塵表經義啓羣蒙揆討達幽竊
居官三十年一節終皦皦鄉評符士論孰謂知者少

送春

天時際小變人事多乖違負卻花下尊亭榭空煙霏
一旦報春去悵悵何所依羲馭不可挽凝睇殘紅稀

相見在隔歲冰雪還郊圻睠彼幽壑中翹首瞻光輝

九日不赴東濱席

山林老華髮不厭時日親胡乃成秦越負此黃花春
君結詩酒懽屏几無纖塵嗟予守一榻藥裹相主賓
同袍不同調造化良不均役役身後圖舉世多愚人

敘老

白日強支持猶云身未老上牀自撫摩肢體半枯槁
神衰入夢難入夢復潦倒濛濛天際花冥冥澗邊草
始若海島居忽爾長安道邂逅平生交彼此呼懷抱

不知何所終悅樂翻懊惱覺來東窻紅唇舌甚煩燥
呼童烹寒茗益之以梨棗聊展案上書漫理腹中藁
嬉遊且終日浮生苦相保時事了不聞柴門跡如掃
永瑛

山居志感

江鷗只馴水野鶴不受籠孰云遊方士肯爲塵所蒙
風清紫芝谷月白青蓮峯學道歲未晚尋師吾遠從
其二

嘉蔬植我園好鳥巢我樹樹枯鳥驚棲園荒蔬委露
寒氣肅山林新芳颯然故物理有固然於何起欣惡
苦哉行用西邨韻

我儋願無儲不願年飢荒飢荒民薄斂無粟充大倉
我心願無權莫使民悲傷悲傷有行役子去母斷腸
霖雨苦不止乃爲萬物殃重雲昏六合寒日慘無光
憶昔漢諸郡黔黎仰龔黃刑罰不苟施格言挫豪強
草木亦被化熙熙皆春陽道傍無拾遺豈聞有豺狼
緬懷千載上揮泪沾我裳

結客少年場

結客少年場春風吹綠楊金鞭控白馬繡帶繫羅囊
醉月罷燕市看花向洛陽五侯七貴子並轡列同行
青春少年子

五陵縱豪俠兩都矚青紫驄馬挾朱弦王門被珠履
出入侍寵驕輝赫駭朝市借問山澤癯何如少年子

陳瀛

東舍詩贈錢公良

春陽藹芳鮮淑氣回東舍百穀順時長穰穰復蘧蘧
此中水木佳達人賦婦歟課僕勤我畊教子勤我書
歲時樂且康散步臨郊墟素心厭紛華日與勢利疎
老稚咸用情生理環吾廬墻下鬱柔桑圃中盛嘉蔬
閒客或來至竟日談玄虛富貴不汲汲所以得自如

小瀛洲十老社詩卷二

東圩翁孫錢孺穀

錢千秋

西臯翁孫鍾祖述

鍾令聞

輯

曾孫

較

七言古詩

朱朴

九日西臯席上得海字

去年宴重陽對酒作狂態今年復登高狂態猶未改
尊中酒盡須再買枝上茱萸正堪采君不見彭澤歸
來忽千載藍田舊客今安在人生行樂貴及時白髮

衰顏鎮相待莫辭爛熳倒接離亂插黃花歌慷慨白
雲杳杳去南山明月離離出東海

寒食行

寒食清明天氣晴家家上墳齊出城小家叢塚不栽
樹雖有紙錢無掛處大家新墳松柏多羅城石柱高
差我兒孫跪拜女嬋哭杜鵑啼血黃鸝歌誰家古墳
生荒草滿地落花人不掃當時從葬極繁華碑碣猶
書鸞鳳誥鑿地聚土作玄宮術人指點來三公三公
不來術人去只有石獸嘶秋風子孫流落無可奈翻
道此墳風水害又疑棺槨有金銀掘作平田向人賣
嗚呼世間萬事空紛紜貴賤變化皆浮雲生前但有
一杯酒身後何須三尺墳

秋夜吟四章

更漏長枕簟涼佳人思清夜遊子悲故鄉東方未明
河半落北斗正掛天中央誰家和泪搗衣裳

其二

城上角城下柝獨宿夢魂驚罷吟懷抱惡江上秋風
鴻雁來芙蓉楊柳俱蕭索誰家吹笛梅花落

其三

風披披露淒淒草虫互相語林鳥無定棲人來不來
關塞隔月出未出天河低誰家屋頭鳥夜啼

其四

燈的的蟲唧唧香鑪餘灰灰漏殘咽寒滴孤螢入屋
穿北牖缺月流光隱東壁誰家機杼當窻織

戴文進風雨歸漁圖

長風吹林羣木亞雨腳如麻水如瀉前山咫尺隔
冥江黑雲昏日將夜老翁捲網歸去休有魚無魚何
足憂危檣十丈貨貨重愁殺三江估客舟

山中懷人

空山闐寂兮無人麋鹿猿狖兮成羣風瑟瑟兮自起
泉滴滴兮相聞晨光發兮出日夕色暝兮歸雲獨怊
悵兮登陟渺余懷兮思君

錢琦

朱西邨老人歌

南村老人壽且富屋外原田映煙樹北村老人貴且
康出門覩者滿道傍獨有西村朱仲子家徒四壁蓬

蒿裏白髮鬢鬢一布衣。閉門不出名千里。老人抗志
空浮雲。笑看一世爭紅塵。筆底青山自堪賣。杖頭赤
仄誰言貧。擊節狂吟振金石。篇篇秀作芙蓉色。曉起
臨秋千樹丹。醉後看天雙眼白。嗟此村南村北人。富
貴勞勞竟何益。

歸來吟

東畬老人罷官歸。日將殘帙支空帷。蓬蒿沒堦斷行
轍。惟有飢雀來相窺。骯髒從來憎病骨。束髮還驚鬢
毛白。無才不足言事君。有子當知能報國。我不願頭
白爲公卿。亦不須羽化登青冥。但願尊中有酒頻相
傾。醉看曉月聽流鶯。陶然天地俱忘情。

猛虎行

深林獵獵腥風吹。咆哮裂地山木披。村人奪魄發狂
叫。曳尾不顧行遲遲。吁嗟猛虎胡爲敢。如此我有射
罔傳。長矢寢處汝皮抉。汝皆莫道今無卞莊子。

卜居爲友人作

桃花兩岸春水肥。水邊卜築開荆扉。雞犬向門未肯
入。村舍兒女穿竹窺。長鑱猶帶故山色。短墻初受新

雨泥社酒喧喧誰上客東會先生髮最白醉後出門
看遠林從此頻過話長日

江南行

江南風氣稱輕揚門闕往往隳膏梁繇來口體足甘
繡目不識丁言文章畫船青樓振簫鼓不事賢豪事
歌舞寧知朱紱起蠶鹽卻視黃金等泥土。驕奢淫泆
成自然冶游壯盛空流年一旦喬松萎霜露世情寒
煖不如前春花秋葉須臾改瞥見枯埃蔽滄海青眼
相看是阿誰門前惟有青山在

徐泰

己亥九日社集五畝山

登高西山風日好落葉滿地霜林疎磡邊菊蕊青未
綻催花須酒應待吾山堂社筵值令節野蔬佳實羅
盤盂老僧情濃酒更美於此不樂將何如紅塵世路
多輻軻吾曹已幸無馳驅酒酣賦詩各寫興豈必音
律諧笙竽東臯高臥亦胡事佳咏可補不可無老我
獨笑詩腸枯分韻卻得茱萸茱

墳上樹

墳上樹高有人賣樹去穴開無土塞穴中死者幾十
人何幸今朝見天日嗚呼死者爾有子孫莫悽然將
掘爾屍賣墓田

賣婦謠

東家賣婦江南去西家賣婦江南去肝腸寸斷兩不
知涕泪併作河流注哭聲震天天地悲道傍觀者各
淚垂人生不幸遭此時他家食却親生五歲兒

西陵峽歌

兩山夾江如壁立千尋萬尋青鐵色江流如龍山罅
來動地雷聲喧白日山高不見飛鳥過舉頭青天一
尺多蒼藤古樹翳滿目沿崖亂石其奈磊砢巉巖何
嗚呼峽中之險險莫比昔嘗聞之今信矣商人重利
卻輕生吾獨何爲亦來此黃陵廟下不可游空舸塌
洞尤堪憂十前九却過一險百夫力盡顛崖頭垂堂
遠遊古所戒靜言思之心膽駭中流欲歌行路難哀
猿又起寒煙外

七夕歌

鳳梭不語鸞鏡開天孫輟織臨妝臺妝成不愁月娥

妬粉香散落青冥來鵲橋靈風響秋珮寶車雲旌三百隊繡衾抱得雙妃央河西去與牛郎會懽會不足還別離最恨是此新涼時羅巾泪痕拭不盡愁緒忽亂機中絲嗟乎天孫莫須惱別不爲多會非少天家一歲當一日天地何嘗有衰老但願郎心終古在視妾嘗如嫁時態不似人間薄倖郎只戀新婚忘舊愛綵樓乞巧何所憑豈識天上非凡情我歌一曲坐二更耿耿銀漢西南橫

宮人午睡圖

淡宮沉沉清晝長高簷影落梧桐涼鰕鬚宰地燕無語飛篆不斷金鑪香鳳皇欲繡還停手睡魔尋人如中酒銀屏翠簾碧紗幘濯濯春風臥楊柳弓鞬卸下雙蓮金香浪捲起紅鴛衾鬢雲蓬鬆枕玉膩眼波不流睂黛淡侍兒側立不敢語手中團扇輕輕舉曲瓊纔下越嶺雲幽夢已作巫山雨爲雲爲雨樂何厭午睡甜如夜睡甜君不見李家海棠睡未足內庭已走街花鹿

吳昂

重陽社飲

九月九日菊花黃少壑移本置中堂有酒無肴坐待
晚嚼英浮白傾數觴豐厓預招作社主賓集醉歌歡
且舞悔余舟發却停橈寂莫溪頭阻寒雨

十月十九日社集分韻得草字時有海塘之役
仙家自住蓬萊島貝闕龍宮人跡杳凌風一日過大
瀛俯視海壖驚欲倒海鹽秦舊邑邇來已三造剝牀
寢及膚包桑計須早老塘吼噪勢已危掌地三邊海
環抱颶風作惡浪滔天斷岍殘堤豈能保巨鰲戴山

不復得長鯨吸海胡可了荆公石堤故無恙吳越錢
塘堅且好天缺鎮金牛天吳籠鐵罩永作萬全圖備
豫斯盡道南自秦駐峯北至月涇洩長堤屹如山不
畏衝波搗古來治水稱神禹八年跋履形神槁功成
萬世永賴之堤海於今須克紹大人勛烈天地參誰
謂古人不可到東吳樂業朗吟歸自墾煙霞種瑤草
戊戌元夕前三日海村宅社飲

昔在閩南燈節夜長衢雜選馳車馬家家門巷燭輝
煌處處亭臺樂杯竿羣寮宴集開錦筵衆技呈奇恣

遊冶飲酣博塞間歌謳命中呼盧競高下何如今夕
聚賞歡酌酒賦詩情更雅

陳鑑

古意

壯懷落落無所依青天擊劍雲西飛丈夫生世少知
已荆山之璞埋光輝故情百年刀割水新歡如花何
易腓玉壺傾酒倚瓊樹千峯翠濕芙蓉衣

巳亥九日登高

秋風千厓吹老樹攜尊花飲羣公聚茲辰南國屈重
陽玉壺載酒登高去川明岳秀風日晴林嬉野酌都
成趣醉插花枝細菊馨浩歌白石長雲暮城南七十
六高峯一年一作登高處

徐咸

九日西臯社飲得遶字

海鄉雲物驚秋杪遠客歸來官債了登高忽作出郊
行聯翩杖履風塵表濟南太守詩家豪黃菊花前設
清醪飲酣把菊插滿頭興劇翻嫌酒腸小吁嗟四美
不易具百歲光陰如過鳥去年此日登峴山今歲峴

山河杳杳淵明昔撫無弦琴古來海內知音少但期
歲歲遇茲辰紅樹青山席前遶

寒食歎

東村有墳高突兀玄宮已爲狐兔窟西村有墳松鬱
鬱須臾掘見黃泉骨人生苦計欲千秋豈知弗克庇
身沒寒食家家去拜墳此墳日落號飢魂我疑此墳
子孫絕子孫揚揚尙時傑不于睥睨不敢言有泪自
流中自熱江山桃李爭芬芳東風到處皆春陽唐陵
漢寢久荒寂且醉花前現在觴

望南嶽

衡嶽根盤八百里起自回鴈岳麓止七十二峯聯絡
青祝融之峯半雲裏江南巨鎮惟此山匡廬桂嶺未
可班平生雅興在山水病冗交併徒塵寰湘江蕩舟
幾回首一見峒峩一心走有山如此弗能登卻向荆
榛尋培塿

雨中芍藥

牡丹開時風日暄開尊喚客觴花前童歌遏雲林鳥
樂花亦解喜爭妖妍芍藥花開風雨惡園門晝閉煙

龍幕主人睡起獨凭闌花亦垂垂如泪落吁嗟二花
皆奇英天豈厚薄爲陰晴古來國色遇不遇明日天
晴春尙住

劉銳

題煙雨樓

我聞煙雨樓昔在湖之中曾詢鄉老言渺然匱遺踪
關西來守趙相公手披圖誌鳩僝工頃刻湖面增穹
窿樓臺特起摩晴空勢吞七邑何豪雄凭闌縱目開
心曾八窻洞達光玲瓏其上直與天門通其下直抵
蛟龍宮悽煙慘雨時溟濛倏忽變態春爲冬越雋遠
見香爐峯泰山可擷青芙蓉少焉月出滄海東水天
倒映雲木重呼吸元氣鞭長虹我欲邀爾朝空同

征婦送春詞

門前楊柳枝去年花飛生別離夫君騎馬出門去沙
場轉戰無歸期今年花飛白如雪天涯咫尺音書絕
青春忽逝妾心驚朝來鏡裏消紅頰韶光空對烽煙
地閒看飛花暗垂泪華屋雙雙乳燕歸流鶯交語藏
淡樹妾有一尊酒送春南陌頭夫君莫學楊花性隨

風飄泊還東流願得楊花化爲樹門前繫馬維歸舟
馬亦未歸舟未返獨上高樓凝望眼明年春來郎亦
歸柳結同心正堪挽

鍾梁

南谿社會

亭亭黃菊淨孤芳溪翁速客羅酒漿憑欄縱自各回
首千古江山惟此觴請君莫話封侯事萬里煙雲秋
草長

龍見有感

龍師昨日鞭龍起風激雲翻百餘里河流沸騰喧兩
耳茂林飛鳥盡南徙平疇忽爾三尺水田夫餉婦拜
且喜須臾天宇淨如洗龍尾倒曳斜陽裏吾邦久乏
良畫史神物變幻端可紀丈夫有才合驅使將相勳
庸或能儼胡爲白首坐塵滓

民艱

落日未落江霧黃歸鳥欲歸相頷頰老翁入息且炊
爨腐薪濕突寒無光長安斗米不論直石壕官負何
繇償安得來牟遍阡陌頓令災沴回禎祥

海上觀巨魚歌

嘉靖辛亥

颶風怒號海水窄洪濤撼天日無色沙崩岍壑如轟
雷龍宮異怪藏不得蛟螭噴薄煙雲橫萬千鱗介咸
逃生故窟遐徙竟相失九州一壑空營營吾鄉適際
東南趾淺瀨平堤百餘里潮來潮去等閒看短筏輕
舂晚還艤何方巨魚困沙中首尾廿丈氣甚雄向人
長吼若控訴風濤失勢悲途窮皮如青銅色尤老雙
瞳炫日車輪小黛鬣丹腮頸亂髮頰尾蕭疎縮蓬草
海岵嗜利揮吳鈎淋漓血肉同屠牛竭將烹售徧交
錯俄頃橋市成山丘故老驚猜是海馬無憑誰解分
真假茫茫水族摠難知愧我學詩猶瞽者曾聞驊騮
猶忍飢崇朝千里勞驅馳巨魚雖巨塊然峙飛騰那
力將胡爲上天有意加窘辱白骨稜層斤斧斲返炤
波明霧忽迷數聲漁笛滄浪曲

猛虎篇

天生猛虎牙爪利百獸不敢相肩視一聲山谷若爲
轉巨榦喬枝皆委地上帝惡其勢太雄特遣力士相
追從劍唇戟齒不爾用南山頑石頽其鋒虎今虎今

力何有草根木葉皆掣肘猿猴嬉游笑且隨剝果羅
蔬酬爾酒虎亦垂頭自怨嗟人生得志莫矜誇何如
赫赫臺中吏只管焚香了歲華

永瑛

漁父圖

爲漁歲頗足水國魚鰕熟結網獲黃麻炊飯然青竹
江頭日出孤嶼明白鷗點破春煙綠

陳瀛

贈錢東畬兩郎取次及第

臨江太守天下士林壑懸車老文字教得郎君才且
賢先後聯芳登甲第鎔金出冶雙劍光鳴鳳嘒嘒飛
翱翔下有竇桂森成行奕葉繼美升廟堂東畬舊田
三百畝畊焉學焉天祿厚稔聞先生多格言清白傳
心世相守

小瀛洲十老社詩卷三

東圩翁孫錢孺穀

西臯翁孫鍾祖述

輯

曾孫

錢千秋

鍾令聞

較

五言律詩

朱朴

餘春園夜宴

何處春光好。襄陽刺史家。池香新漲雨。林密暗藏花。
杖履通三徑。圖書散幾車。幽人美良夜。河漢忽西斜。

澄心

臥病諸緣絕澄心萬慮空開門移白日高樹落清風
晚節青藜杖家資綠酒筩懷人不可見吟斷寂寥中

和西臯刈稻

刈美
刈

刈稻西疇上看山野樹根輟畊憐犢瘦投餌笑魚吞
奄忽歲年暮淒其霜露繁田園莽秋色松菊幾家存

壬寅除夜

歲歲逢除夜家家贍酒觴畱窮殊不惡卻老更無方
夕漏餘寒滴春燈候曙光靜聽童稚喜猶憶少年狂

靈隱寺

合澗橋頭水飛來洞口山鳥盤蒼壁影僧掩翠微關
松露晝還滴嶂雲秋更閒一年嘗一到一到一忘還

聖果寺用古韻

下界聞鐘梵中峯隱薜蘿海門朝日近沙市暮帆多
鳳去山空老龍蟠井不波宋家宮樹在啼鳥學笙歌
寒夜

往事真成夢憂來不暇忘老年終少睡寒夜故多長
漏屋窺殘月重衾壓曙霜鳴鷄如有爲嗷鴈欲何翔

歸舟

榆柳綠陰成菰蒲野水生好風催掛席遲日衍歸程
麥熟吳蠶老桑稀布穀鳴南山橫一抹漸覺近人明
錢琦

歸來

勿謂歸來晚桑榆午正陰貧嫌妻子問老愛故交淡
祇動看山興空懷避世心年光易流轉清夜忽聞砧

九日社集

每逢重九日與客賦登高白髮慚黃菊清言對濁醪
潮聲通海郭山色墮林臬楓葉蕭蕭下狂吟首獨搔

秋原

日薄遠煙淨天高四望清幾人爭野渡匹馬去荒城
風送蟬聲急雲拖鴈影橫誰家臨水上紅樹覆柴荆

徐東濱宅觀牡丹

曾重洛陽記今開孺子家蕊初搏絳雪花漸簇香霞
摘似牽紅線看如鬪麗華若教會解語丹靨未須誇

其二

午暈顫風斜流雲欲倩遮暖將開步障煙尚薄籠紗
艷逐春情蕩香添酒力奢低回吟未足殘日水西涯

靨
頰

送子芹萱會試

送汝長安道風霜共此行。片帆雲外遠。雙雁日邊明。
獻玉投人意。泥金慰我情。慈恩倘題字。拂拭老夫名。
憶齋兒客金陵。

歸棹竟何日。千山阻石頭。倚閭愁老眼。作客奈深秋。
木落知衣冷。江空遶夢流。舒祺吾豈愛。倘亦付弓裘。

凍鵲

荒林逗落日。凍鵲下江臯。朔野空禾黍。寒天鍛羽毛。
聞聲猶送喜。遶樹亦知勞。若道樊籠煖。巢寧護雪高。

過大佛寺復放舟湖南

石作毘盧觀。旋登彼岸游。溪深松低白。日碧澗寫清。
秋色滿湖雨。笛聲何處樓。攀躋興不已。月出更移舟。
社飲遇雪不赴。寄諸友。

地塞斷行路。天低暗落暉。不憐孤客冷。但惜故人違。
凍井無薪爨。高門有葛衣。西山羨諸彥。豪飲未曾歸。
歌風臺

蔓草迷殘碣。荒臺走白波。英雄起亭長。父老說蕭何。
廢井寒泉少。空庭落木多。當年懷猛士。撫劍此高歌。

獻花巖

獻花巖畔寺着屐漫登臨花發年年好巖深處處陰
步來尋落果坐久換鳴禽世路何多事看山獨會心
自靖祠祀練公子寧

中原龍戰起萬國撼雷風天意別有主人心獨在公
青山無斷骨白日見孤忠到此看臣節羞言靖難功

移病

移病方辭國幽懷獨自歡有山如好客無事且加餐
弓影經年釋刀頭傍月看敢因江海志忘卻主恩寬

題友人別業

地深塵不到林靜鳥還鳴以我欲逃世逢君此結盟
傍簷花歷亂當戶石崢嶸坐對堪幽賞超然丘壑情

渡曹娥江

游目縱千古長風揚遠舫山川標越絕天地託精靈
怨與雲俱鬱啼將雨共聽獨畱江上草猶作漢時青

題牧羊圖

無論仗孤節不作漢家羞卽看今日畫猶起管時愁
墨染雲偏重綃含雪未收數牴安得乳空白子卿頭

過宿州卽事

荒邑臨高壤長渠水撼流山貧綠樹少村斷遠煙浮
歲食資麩麥年徵竭馬牛朝來城下路野哭動溪秋

徐泰

宿巫峽作

巫山高幾許可望不可攀猿猱度天上日月隱岩間
神女雲猶在襄王夢不還愁懷正此極密雨又驚灘
其二

愁懷不可極物候又殘冬故國五千里行人十二峯

天寒風颯颯江暗雨重重不與猿聲約更淡到客篷

吳昂

南溪草堂

一泓寒碧瀉環帶野人居映水千竿竹藏春萬卷書
秋風登隴秫春雨剪畦蔬杖屨閒來往幽懷得自如

九月十九日菊飲

九日醉幽香經旬又舉觴人情憐晚節天意肅新霜
色賸秋籬艷英畱野老嘗衰顏如肯駐卻此貯餽糧

湖東訪友

湖東訪玄渚破浪一帆輕
漁網懸風動農車湊水平
桂香花信早詩味道心清
歸路逢寒雨山蟬寂不鳴

仲冬望日社集

初昏斗建子月律協黃鍾
疎柳萌春意微陽肇化工
感時希道泰憂國祝年豐
清世求閒退惟吾所好從
晚色軒宴集分得家字

小春憐晚霽庭際尙黃花
列坐談霏雪開尊對落霞
賓迎新杖履鷗狎舊汀沙
桑柘優游意尋嘗過酒家
宿黃崎鎮寄友

春山倦行役駐馬振征衣
雨過溪流急風生竹籜稀
谷幽聞鳥語日暮看雲飛
自出長谿郭懷君首重回

陳鑑

野臥

野臥任遲晏窻涼清睡殘
林虛雲影動石沒水容寬
微露幽花濕輕風小蝶寒
夜來萱草發徙倚竹闌看
雨中喜西邨諸君見訪次韻

淡酌看清雨田家無好春
年光餘徑草風味只溪蘋
此日有限日幾人無事人
醉眠君未去交誼向吾真

秋夜

時序易流轉秋聲入井梧
干戈聞朔漠搖落動江湖
世事蚤相弔年光草半枯
曉窗明鏡裏不敢看頭顱

次石林韻

結菲遠墟落白日有禽言
野夢牽風石清泉過竹門
絕糧憂鶴瘦爭果怪兒喧
欲問栽松法僧來與細論

東明池上

清境秀羣木更煩風日留
嘗茶山竹靜聽鳥石窻幽
地遠林空暑中涼水應秋
西峯坐來晚澗影帶雲流

春日邨居

草綠鳥飛散孤邨白日虛
心清思慮寡地遠世情疎
春色遙添水山光半落書
廿年中外履閒只到僧居

訪石林

海雨濕山木野泉通竹籬
偶隨流水去卻值道人期
坐久日移午來稀花笑遲
小園春事歇滿舉送春卮

出門

輕舟得風日遲迤菰蒲間
野水泛不盡江花開自閒
高情渾白鳥遠影忽青山
鷗鷺知真意長竿不厚顏

席上

古鼎煮寒月涼天東老家冠裳臨水淨籬落帶雲斜
幽意看黃蝶清吟對白沙不須愁酒盡市近易爲賒

次韻

碧漪含細風浦漱晚涼空花草年光歇江邨農事同
舟移林影外山度鳥聲中別是乾坤裏疎慵有此翁

徐咸

九日偕西村諸友登峽山歸宿西樓

九日天容淨雙峯秋氣高登臨我輩健放達管賢豪

客醉黃花酒僧供白雪糕詩成興未盡落日滿青袍

其二

野興秋來漫杯淡菊正香江風同泛棹樓月復聯牀
山遠不聞漏夜寒疑有霜片雲將鶴夢身世兩相忘

憩曾門寺

風埃汗客袂木石隱禪關路自窮厓入人如倦鳥還
盤餐來澗底鐘磬出雲間莫便匆匆去松淡一榻閒

宿鹿門寺

閒寂鹿門寺蕭森鶴樹秋夜淡星斗下臺迴殿堂幽

泉響穿僧榻鐘鳴彷彿樓緬懷棲跡者遐軌邈難儔
遊牛首山

鐘磬青霄上樓臺白日邊千年牛首寺一勾虎跑泉
徑狹松聲合堂虛塔影懸何時脫塵鞅來此學逃禪

望廬山

望望廬山勝行行過碧岑有雲峯益秀無雨洞嘗陰
飛瀑秋垂練澄湖晝躍金看山到此地已了半生心

賈太傅祠

長沙楚名郡賈傅漢賢臣祠廟三湘舊文章百世新
明良自難遇絳灌亦何人澤畔行吟者公應是後身

宿柴店舖

落日明遠岫征車止破郵春寒翻勝臘山靜只疑秋
酒色浮銀燭梅芬襲罽裘白頭林下叟說盡野人愁

宿唐安寺

雲竇飲殘雨石窻生嫩涼高城更漏急別殿夜燈光
客夢蒙泉上歸心漢水旁池蛙約庭蚓聒近竹方牀

暮春

白日去何速青春不可羈棘林花落子菲屋燕將兒

酒債憐清老風情笑牧之呼童掃苔徑應有客相遲
登城

春城疎雨歇晴色滿宮牆海潤峯巒秀天空鶴鶴翔
平蕪沙際綠紅杏竹淡芳忽漫逢知己相攜入醉鄉
踏青至太子廟

散步出西郭乘風支瘦藤逢人頻問路扣寺欲尋僧
花落紅雨亂麥搖碧浪層歸來日將暝渡口已漁燈

劉銳

閒居

老去心無事閒居景物移簾虛通燕壘花盡實蜂脾
月影杯間墮茶煙竹裏炊此時幽興極海鶴共襟期
庚戌元旦

庭樹回生意山翁只故貧掃苔憐杖跡吹壁落詩塵
谷僭鶯遷煖年隨曆換新苧湖尋舊業容作問耕人
和徐東濱

何處幽棲好城西有茂林山來當戶翠竹長隔牆陰
哺子飛梁燕窺魚下水禽閉門無所事赤日任流金

其二

盡日焚香坐茶爐在竹林欲攜一杯酒來借小亭陰
待月吹孤篴停歌下宿禽朱顏不可買何以鍊黃金

製履

雨淡思短屐來共杖藜閒破凍畱吟迹行春破蘚斑
松陰同鶴寄山徑踏雲還不識朱門路惟諳山水間
苦雨

九十春過半淡寒猶絮衣海翻高浪入風帶濕雲飛
幽意頻看野詩愁獨掩扉欲將攜釣具江上問漁磯

夢到山家

幽踪何所適來訪野人家藤老高懸樹溪清淺見沙
飯牛歌白石養鶴長丹砂渺渺乾坤裏人生豈有涯

秋野

城外風沙少秋高山水清看山呼鹿坐臨水狎鷗盟
窻靜雲長度林疎月倍明夕陽樵牧返橫笛兩三聲
雨霽南城池上

一雨散長空臨池策短筇新荷爭疊蓋欹樹學垂虹
堦轉穿林日窻含度水風詩成興不淺雲際一聲鐘

胥江

卜築耽幽性門前水一灣舟輕同鶴載人老共鷗閒
釣弄波間月詩成檻外山客來忘爾我送不到柴關
納涼聞警感懷

地僻喧囂寂風煙隔翠微月明孤角語林靜數螢飛
塞北仍嚴武江南正解圍幽棲何處隱涕泗欲沾衣

秋暮

歲事關心切金商忽整鞭菊開霜信後秋盡雨聲邊
晚甕醅新秫寒衣貼舊綿閉門無俗事詩句送殘年

鍾梁

錢東圩社飲集西樓得來字

虛閣雲霞迴滄溟一鏡開青山高復下白鳥去還來
蓮社酬時序葵香入午杯追歡期秉燭城漏莫相催

感特

孤城圍石浪淡谷隱菲茨未畢棲遲願翻增禍亂悲
飢鳥鳴野渡戎馬暗江濬懊惱沙場草春風不受吹
夜坐懷石林上人

月升河漢淨竹近野堂幽締綌渾無暑菰蒲早得秋
坐羨聊假寐望遠迴添愁忽憶東林老殘經誦未休

春陰二首

正月多風雨長河一鑑平
隱雷乘暖發細草帶煙生
鹿豕棲林遠鷗鳧入浪輕
前邨春釀綠泥濘卻人行

其二

衰老宜春色淒淒雨雪寒
世情同水逝吾意等山安
甲子新時序滄溟舊釣竿
願言羲駕轉瑞日滿林端

呈豐厓

既醉東濱酒載讀南園文
音響協金石步驟生煙雲
羨君老猶壯媿我少無聞
團坐新亭上清風停夕曛

自遣

風露凝寒信飄然老病身
慰衣防夜冷儲粟慮年貧
斷雁斜陽道飢鳥野渡濱
世途多蹇澁何地問通津

訊石林上人

石林頭似雪趺坐翠筠中
清磬傳滄海天花散碧空
禪心同水月僧臘等空同
他日相從處應知有六通

遊天寧寺

勝寺臨官渡山平萬木齊
巖城行旅少曲澗野航迷
佛座翻春蝶齋筵待午溪
行行登古塔細讀舊賢題

賦得干戈方滿地

造次來溪上新營屋數椽茅疎通霽月水溢護秋田
憤世嵇康泪逃名范蠡船干戈方滿地何日淨風煙

雨中

一月春郊雨鶯花暗結愁凍枝殘雪在幽谷野泉流
寺廢僧投飯山空客倚樓漁翁亦無賴罷釣過溪頭

感事

師老寒潮上民勞烈火中是誰司國計何以慰宸聰
憤世多才子平戎少令公杞憂心獨苦掩袂向東風

春塘

東風吹綠水生意滿方塘冉冉流雲濕娟娟藥草香
鷗鳧親釣石月露淨琴囊予欲投簪笏相攜學采芳

次東濱韻

水寺盤桓處談棊有石林兵戈來海口風雨隔山陰
樹古巢春燕樓寒散暮禽西湖有良約擬費日千金
見燕有感

社燕來何晚春寒滯一方今逢沙日煖不計海雲長
棲息惟菲屋翻飛泣畫梁翟公門下客見爾愧炎涼

不寐二首

蟋蟀不停聲。寒城欲二更。月明潮正落。霜薄草還生。
世路黃金貴。山林白髮輕。淵明一杯酒。豈止慰閒情。

其二

戍鼓初傳夜。沙頭鴈鶩歸。山空楓葉盡。潮涌雪花飛。
兀坐心無累。明時願久違。滄洲有吟客。酬賞欲相依。

寄友

避亂依城郭。呼童學治園。竹深羣雀下。波靜一魚翻。
壯志猶談劍。衰容且負暄。汲泉烹石茗。拂席待高軒。

永瑛

薙髮

短髮頻頻剃。年華冉冉增。青山成老醜。白日醉曹騰。
不應檀那供。恥爲文字僧。願言煩惱盡。一任馬牛稱。

漫興

何處堪消日。虛齋水竹邊。鈎簾飛白鷺。洗硯落紅蓮。
經卷聊云爾。篋瓢每晏然。客來無雜話。茗飲只談禪。
春夜同錢東圩先生宿天風海月樓

璧月花間出。仙雲樹杪浮。山人將上客。春夜宿層樓。

海色涵霄漢。星文動斗牛。只應天路接。何必泛槎遊。
冬日

孟冬晴暖日無事。病閒時白屋開嘗晏。青山睡起遲。
巖厓馴鹿性。門巷網蛛絲。過午齋廚乏。攜筐采玉芝。
病中答西村

野人淡養癖山木。小堂虛草帖。惟求藥持齋。不食魚
春蘿漫石壁。秋水淨堦渠。門徑荒蕪裏。何時爲客鋤。
溪堂晚坐

捲簾溪雨歇。樹濕小堂涼。未晚歸禽集。先秋病葉黃。
浮雲悲世事。落日坐漁梁。幽意無人會。鐘聲出院長。
其二

幽庭成獨坐。疎雨滴松涼。雲破天光碧。風吹月暈黃。
濕螢明暗竹。飢鼠落空梁。渺渺滄波外。依依塔影長。
宿西澗次勾溪韻

山月上虛壁。松風開石房。樓臺隨地迴。河漢近衣涼。
徑側桐陰合。墻危藥蔓長。相逢俱病裏。燒燭簡醫方。
秋浦

白露下蒹葭。秋汀尚有花。數峯迴晚色。一雁落寒沙。

菰熟供炊事。鱸肥上釣槎。月明吹笛去。隔水是漁家。
半隱

讀書不出仕。學稼敢忘君。夜誦城南月。春生谷口雲。
用之伊呂事。去矣鹿麋羣。豈是冥棲者。終身作隱淪。
勝果寺中峯閣用唐處默韻

古寺梯雲磴。長松帶女蘿。山空秋意早。江濶晚涼多。
白鳥逾青壁。紅霞閃碧波。西岩昏磬罷。猶聽采樵歌。
睡起

睡起高梧下。新涼滴雨疎。秋光團竹淨。暮色上簷虛。
多病便高枕。餘生了敝廬。萬緣從物變。吾道只如如。
與僧夜坐

道境隔塵世。夜良因臥遲。清風生簟處。涼月上窻時。
法味烹龍井。緇衣織兔絲。山中無桂樹。何以託幽期。
西閣早春

西閣攜書幌。中年洽道情。焚香連日坐。幽意白雲生。
世路人爭往。春山鳥自鳴。靈臺虛靜裏。江月夜同明。
陳瀛

月夜泛湖

八
海
沙
元
言
卷
三
六
秋月生滄海秋風吹石梁青天借風月綠水命壺觴
此景古人樂方乘今夜涼
停盃照湖色何必減圓光

